

摛藻堂四庫全書薈要

經部

欽定四庫全書會要

經部

春秋集解卷五



詳校官原任侍講臣王慈緒

欽定四庫全書  
春秋集解卷五

經部

春秋集解卷五

宋蘇轍撰

僖公

元年春王正月齊師宋師曹師次于聶北救邢夏六月  
~~邢遷于夷儀~~

諸侯救邢邢人潰出奔師師遂逐狄人具邢器用而  
遷之師無私焉故書曰邢遷于夷儀言自遷也

齊師宋師曹師城邢

城邢之師則救邢之師也何以復序善城邢也

秋七月戊辰夫人姜氏薨于夷齊人以歸

夫人薨不地在外則地哀姜孫于邾齊人反而殺之于夷以其尸歸不言殺諱之也君子以齊人之殺哀姜為已甚矣女子從人者也雖其有罪非齊之所治也

楚人伐鄭

荆自此改號曰楚交通中國春秋始以人書之然猶

君臣同辭凡書其君臣者皆特書也

八月公會齊侯宋公鄭伯曹伯邾人于檉九月公敗邾  
師于偃冬十月壬午公子友帥師敗莒師于酈獲莒孥  
莒人責慶父之賂季友敗之而獲莒子之弟拏特書  
喜之也凡徒執曰執兵執曰獲諸侯戰而死曰滅生  
曰獲大夫生死皆曰獲

十有二月丁巳夫人氏之喪至自齊

齊人殺哀姜而以其尸歸絕之於魯僖公請而葬之

不稱姜氏何也文姜之孫也不稱姜氏以為義當絕齊也哀姜之死齊既自絕之矣是以不稱姜也然則曷為不於其薨葬焉去之薨葬盡禮雖欲去之而不可得故於其至焉去之也

二年春王正月城楚丘

狄之入衛也衛之遺民男女七百三十人益之以共滕之民立戴公以廬于漕桓公使公子無虧戍之歸公祭服乘馬凡為國之用戴公卒文公立桓公於是

帥諸侯城楚丘而封之不言諸侯魯後至不及序也不言城衛衛未遷也

夏五月辛巳葬我小君良姜虞師晉師滅下陽

晉侯以屈產之乘與垂棘之璧請假道於虞以伐虢虞公許之宮之奇諫不聽遂滅下陽晉主兵而先書虞賄故也下陽虢之邑也非國而曰滅下陽滅而虢亡也五年晉遂滅虢因以滅虞則其滅虢也無難矣故於下陽以滅言之而五年不書滅虢蓋歸罪於虞

也

秋九月齊侯宋公江人黃人盟于貫冬十月不雨楚人

侵鄭

三年春王正月不雨夏四月不雨

僖公憂民勤雨故每於首月必書不雨

徐人取舒

舒附庸之國也徐取之以自屬故不言滅春秋書徐皆不稱人以其夷故也稱徐人羨文也

六月雨秋齊侯宋公江人黃人會于陽穀冬公子友如齊泣盟楚人伐鄭

四年春王正月公會齊侯宋公陳侯衛侯鄭伯許男曹伯侵蔡蔡潰遂伐楚次于陘

二年楚人侵鄭三年楚人伐鄭齊桓公會諸侯于陽穀為鄭謀楚將以諸侯伐之而未行桓公與蔡姬乘舟于囿蕩公公懼禁之不可公怒歸之而未絕也蔡人嫁之至是因諸侯之師以侵蔡蔡潰遂伐楚責包

茅之不入故蔡曰侵楚曰伐然蔡小國也以齊侵之  
不待諸侯諸侯之師實為楚動而春秋書其迹先侵  
蔡而後伐楚若以蔡故勤諸侯言私欲之害也凡民  
逃其上曰潰在上曰逃楚人方強齊將綏之以德故  
次于陘以待之既而楚屈完來求盟因而許之雖有  
諸侯之衆而不用蓋伯者之師求以服人而已非若  
後世必以戰勝為功也二十八年晉楚戰于城濮晉  
文公退三舍避楚楚成得臣從之不已而後戰方其

退舍而楚還則文公亦將不戰矣由此觀之桓文之  
於用兵皆求服人而不求必勝也

夏許男新臣卒

卒于師也不言卒于師師未訖事也曹伯廬之卒于  
會也書曰卒師訖事也穀梁曰諸侯死于國不地死  
于外地死于師而不地內桓師也雖內桓師使既訖  
事不可不地也

楚屈完來盟于師盟于召陵

屈完楚大夫也楚子使完如師以觀齊完見齊之盛  
因而求盟故不稱使書曰楚屈完來盟于師制在完  
也於是齊桓退舍以禮楚故復書曰盟于召陵言非  
陘也

齊人執陳轅濤塗

齊師之退也濤塗不欲其道於陳與鄭申侯謀而告  
於齊侯請出於東方觀兵於東夷循海而歸齊侯許  
之申侯見曰師老矣若出於東方而遇敵懼不可用

也若出於陳鄭之間共其資糧扉屨其可也齊侯悅  
與之虎牢而執濤塗書曰齊人執轅濤塗執有罪也  
秋及江人黃人伐陳八月公至自伐楚葬許穆公冬十  
有二月公孫茲帥師會齊人宋人衛人鄭人許人曹人  
侵陳

伐陳侵陳皆討濤塗之不忠也前曰伐當其罪也後  
曰侵已甚也

五年春晉侯殺其世子申生

晉侯之嬖曰驪姬生奚齊將立之故殺其世子申生  
父子兄弟人之大倫也而至於相殺則人倫廢矣故  
凡殺世子母弟必稱其君且世子母弟之親非君殺  
之無能殺之者矣是以責之君也

杞伯姬來朝其子

僖公之母成風在焉則伯姬歸寧禮也諸侯之子代  
父而朝禮之變也弱而從其母以朝非禮也

夏公孫茲如年公及齊侯宋公陳侯衛侯鄭伯許男曾

伯會王世子于首止

惠王世子鄭也王以惠后故將廢鄭而立帶故齊桓  
帥諸侯而會之以定其位世子不名而殊會尊之也  
首止之會非王志也帥諸侯以定世子為義也然而  
諸侯不以王命而會世子世子不以王命而出會諸  
侯衰世之事也

秋八月諸侯盟于首止

稱諸侯明王世子不盟也將君天下不敢與之盟也

鄭伯逃歸不盟

王惡齊桓之定世子鄭也使周公召鄭伯曰吾撫女以從楚輔之以晉可以少安鄭伯喜于王命而畏齊故逃歸不盟雖有王命而棄大信以從不義書曰逃歸罪之也

虞公

楚人滅弦孫子奔黃九月戊申朔日有食之冬晉人執晉侯復假道於虞以伐虢宮之奇復諫不聽遂滅虢

師還館於虞襲虞滅之執虞公及其大夫井伯不言  
晉之滅虞虞自滅也秦之取梁也書曰梁亡而不及  
秦以為梁自亡也晉之滅虞也書曰晉人執虞公而  
不言晉人滅虞以為虞自滅而晉人執其君耳虞公  
之不名未通也凡執諸侯稱侯以執伯討也稱人以  
執私執之也執諸侯重於執大夫故得以斥其君也  
六年春王正月夏公會齊侯宋公陳侯衛侯曹伯伐鄭

圍新城

新城新密也鄭所以不時城也齊桓聲其罪以告諸

侯故書圍新城

秋楚人圍許諸侯遂救許

義見上圍新城

冬公至自伐鄭

七年春齊人伐鄭夏小邾子來朝鄭殺其大夫申侯

陳轘濤塗怨鄭申侯之反已於召陵也故勸之城其  
賜邑遂譖諸鄭伯曰美城其賜邑將以叛也及齊人

伐鄭鄭殺申侯以說故稱國以殺言非其罪也

秋七月公會齊侯宋公陳世子款鄭世子華盟于甯母  
曹伯班卒公子友如齊冬葬曹昭公

八年春王正月公會王人齊侯宋公衛侯許男曹伯陳  
世子款盟于洮

七年惠王崩世子鄭以叔帶之難懼不立不發喪而  
告難于齊於是盟于洮王人與盟謀王室也

鄭伯乞盟

甯母之會鄭世子華言於齊侯請去洩氏孔氏子人  
氏三族而以鄭為內臣桓公將許之管仲曰君若綏  
之以德加之以訓辭而帥諸侯以討鄭鄭將覆亡之  
不暇豈敢不懼若總其罪人以臨之鄭有辭矣何懼  
君其勿許鄭必受盟齊侯辭焉於是鄭伯請盟書曰  
鄭伯乞盟而不列於會以其迫盟賤之也賤鄭所以  
貴齊也

夏狄伐晉秋七月禘于太廟用致夫人

禘三年大祭也太廟周公廟也記曰季夏六月以禘  
禮祀周公於太廟七月非其時也夫人哀姜也其死  
也魯人以夫人終之矣然以其有罪而戮於齊不列  
於太廟者八年矣至是始致其主於太廟也夫稱夫  
人而不列於太廟非禮也舉罪人而致之太廟亦非  
禮也其曰用者不宜用者也特言夫人何也哀姜得  
罪於宗廟而戮死於齊且無後於國則既自絕於魯  
矣雖不以夫人終之可也而魯人以夫人終之立之

主而祔之廟雖欲不致之太廟不可得矣故於其致也特稱夫人言其所以得致者惟為夫人故也公羊曰譏以妾為妻也穀梁曰譏以妾母為夫人也此皆意之之辭也求其說而不得是以為此辭也

冬十有二月丁未天王崩

九年春王三月丁丑宋公御說卒夏公會宰周公齊侯宋子衛侯鄭伯許男曹伯于葵丘

周公以三公兼冢宰故曰宰周公宋桓公未葬而襄

公會諸侯非禮也凡在喪公侯曰子

秋七月乙酉伯姬卒九月戊辰諸侯盟于葵丘甲子晉侯危諸卒冬晉里克殺其君之子奚齊

晉侯殺適立庶晉人不順故里克殺奚齊然奚齊則無罪不稱弑其君而稱殺其君之子何也未葬也春秋於子般子野之卒皆以未葬故名未葬而名則未君也未可以稱君而繫之其君著其將君也穀梁曰其君之子云者國人不子也豈有其君之子而國人

不子者乎且國人之不子奚齊與卓均耳不子奚齊而君卓可乎

十年春王正月公如齊狄滅溫溫子奔衛晉里克弑其君卓及其大夫荀息

卓奚齊之弟也荀息奚齊之傳也晉侯疾召荀息曰以是藐諸孤辱在大夫其若之何對曰臣竭其股肱之力加之以忠貞其濟君之靈也不濟則以死繼之及里克殺奚齊荀息將死之人曰不如立卓子而輔

之荀息立卓以葬里克殺卓于朝荀息死之卓之稱  
君既葬且逾年也

夏齊侯許男伐北戎晉殺其大夫里克秋七月冬大雨  
雪

十有一年春晉殺其大夫平鄭父

平鄭里克之黨也惠公既殺里克平鄭言於秦伯請  
出晉君而納重耳鄭則有罪矣然鄭之謀由殺里克  
致之也故稱國以殺言君亦過也

夏公及夫人姜氏會齊侯于陽穀秋八月大雩冬楚人

伐黃

十有二年春王三月庚午日有食之夏楚人滅黃秋七月冬十有二月丁丑陳侯杵臼卒

十有三年春狄侵衛夏四月葬陳宣公公會齊侯宋公陳侯衛侯鄭伯許男曹伯于鹹秋九月大雩冬公子友如齊

十有四年春諸侯城緣陵夏六月季姬及鄆子遇于防

使鄆子來朝

鄆季姬也季姬來寧公怒鄆子之不朝也止而絕其昏故遇于防而使來朝非禮也不稱鄆季姬絕也然春秋未有書季姬歸于鄆者或者鄆子之未為君也歸之歟亦未有書鄆季姬來者來而遂止之則絕也絕則非寧也亦未有書鄆季姬來歸者季姬非出於鄆也故皆不書蓋諱之也公羊穀梁曰非使來朝也使來請已也夫女子也而會諸侯使來請已事蓋有

至此者乎

秋八月辛卯沙鹿崩狄侵鄭冬蔡侯肸卒

十有五年春王正月公如齊楚人伐徐三月公會齊侯宋公陳侯衛侯鄭伯許男曹伯盟于牡丘遂次于匡公孫敖帥師及諸侯之大夫救徐

牡丘之諸侯也諸侯次于匡而遣大夫救徐義與聶

北之師同

夏五月日有食之秋七月齊師曹師伐厲

厲楚之與國伐厲所以救徐也

八月螽九月公至自會季姬歸于鄆

鄆子既朝乃使婦之故書曰歸于鄆

己卯晦震夷伯之廟冬宋人伐曹楚人敗徐于婁林十  
有一月壬戌晉侯及秦伯戰于韓獲晉侯

晉侯之入秦伯之力也既入而背其賂晉饑秦輸之  
粟秦饑晉閉之糴故秦伯伐晉曲在晉也諸侯之獲  
皆言以歸書獲晉侯而不言以歸罪之也凡諸侯失

地則名晉侯之不名何也出而國有君者於出名之出而國無君者於歸名之要之皆失地也而國無君者有歸之道焉耳是以不名其出也不言晉師敗績舉君獲為重也

十有六年春王正月戊申朔隕石于宋五

隕星也莊五年書曰星隕如雨見星之隕而不見其為石也今曰隕石于宋五見其為石而不見星之隕也

是月六鷗退飛過宋都

鷗大鳥也退飛逆飛也書失常也書是月言非戊申  
也何以不日失之也

三月壬申公子季友卒

凡公子以伯仲字者於其卒皆稱其字以兄弟錄之  
也季友仲遂叔貽是也惟牙以罪死故曰公子牙卒  
絕不以兄弟數也

夏四月丙申鄫季姬卒秋七月甲子公孫茲卒冬十有

二月公會齊侯宋公陳侯衛侯鄭伯許男邢侯曹伯于  
淮

十有七年春齊人徐人伐英氏

英氏楚之屬也故齊人為徐伐之以報婁林之役徐  
之稱人何也與齊人序稱齊人不可不稱徐人也

夏滅項

魯滅之也公羊穀梁曰此齊滅之也曷為不言齊滅  
之為桓公諱也桓公蓋嘗滅譚遂矣春秋未嘗為之

諱也且為桓公諱而以魯滅項書可乎

秋夫人姜氏會齊侯于卞

公會諸侯於淮而內滅項齊人以為討而止公聲姜以公故會齊侯于卞其情可也而禮則不可

九月公至自會

不言齊人之執諱之也猶有諸侯之事焉可以言會也

冬十有二月乙亥齊侯小白卒

齊桓公無適子長衛姬生無虧少衛姬生惠公鄭姬  
生孝公葛嬴生昭公密姬生懿公宋華子生公子雍  
公與管仲屬孝公於宋襄公以為太子易牙與寺人  
貂有寵於桓公及衛共姬公許之立無虧管仲死五  
公子皆求立十月乙亥桓公卒易牙與寺人貂因內  
寵以作亂而立無虧孝公奔宋十二月己亥赴辛巳  
夜殯書從赴志亂也

十有八年春王正月宋公曹伯衛人邾人伐齊

納孝公也不言納與入孝公齊之世子也言納與入  
嫌於不當立也

夏師救齊五月戊寅宋師及齊師戰于甗齊師敗績  
救無虧也齊人殺無虧以說宋將立孝公不勝四公  
子之徒遂與宋師戰

狄救齊

救四公子也

秋八月丁亥葬齊桓公冬邢人狄人伐衛

狄之稱人與邢人序稱邢人不可不稱狄人也

十有九年春王三月宋人執滕子嬰齊

稱人以執以其私執之也嬰齊之名失國也

夏六月宋公曹人邾人盟于曹南鄫子會盟于邾

鄫子不及曹南之盟諸侯既罷而會之於邾故書曰

會盟于邾

己酉邾人執鄫子用之

宋公使邾文公用鄫子于次睢之社欲以屬東夷然

春秋書邾人而不及宋何也諸侯之尊善惡可以專之非人之所得使也邾以諸侯而聽命於宋以行不義是以專罪邾也若宋公之罪則不待貶而見矣

秋宋人圍曹衛人伐邢冬會陳人蔡人楚人鄭人盟于

齊

宋公凌虐諸侯故陳穆公請脩好焉以無忘齊桓之德盟于齊齊與盟也

梁亡

梁伯好土功亟城而不能處也民罷而不堪則曰某  
寇將至乃溝公宮曰秦將襲我民懼而潰秦遂取梁  
故書曰梁亡言其自亡非秦亡之也

二十年春新作南門夏郤子來朝五月乙巳西宮災鄭  
人入滑秋齊人狄人盟于邢冬楚人伐隨

二十有一年春狄侵衛宋人齊人楚人盟于鹿上

齊桓沒中國無伯故宋為鹿上之盟以求諸侯于楚

夏大旱秋宋公楚子陳侯蔡侯鄭伯許男曹伯會于孟

執宋公以伐宋

楚方稱人以執宋公故特書楚子楚子實執宋公其序諸侯以執之何也宋公不度德量力而爭諸侯諸侯之所不予也故序諸侯以執且不予楚子專執中國也楚未嘗與諸侯會盟及齊之盟序蔡下鄭上蓋未能服諸侯故以爵序至是而諸侯服之故遂先諸侯

冬公伐邾楚人使宜申來獻捷

不稱楚子非特書也特書宜申以其接我也不稱宋捷不予以楚之捷中國也

十有二月癸丑公會諸侯盟于薄釋宋公

孟之諸侯也凡諸侯見執而不失國者於歸名之書曰某侯某歸于某此其不名而言釋何也以為執之釋之皆在諸侯也若是而尚可以求諸侯乎所以深咎宋公也且書曰歸于某而名則自名也書曰釋宋公而名則以諸侯名之也皆諸侯也而可以相名乎

二十有二年春公伐邾取須句

須句小國而邾滅之取而反其君焉禮也不書須句之滅與其君之復弱不能自通也

夏宋公衛侯許男滕子伐鄭秋八月丁未及邾人戰于

升陘

邾以須句故侵我公卑邾不設備而禦之我師敗績邾人獲公胄不稱公不書敗皆諱之也莊九年乾時之戰不稱公而書敗何也敗不及公也升陘之敗公

幾於獲故諱敗也

冬十有一月己巳朔宋公及楚人戰于泓宋師敗績  
宋公被執見釋而猶爭諸侯楚以夷狄而干諸夏故  
泓之戰雖曲在宋而春秋辭無所予公羊曰言日言  
朔正也春秋辭繁而不殺者正也楚人涉泓而未畢  
濟有司請擊之宋公曰不可君子不厄人既濟而未  
畢陳有司請擊之宋公曰不可君子不鼓不成列已  
陳而鼓之宋師大敗雖文王之戰不過此也夫文王

豈以一日不鼓不成列而為文王哉其所以服人者遠矣以宋之德而為是則亦不知戰而已春秋何善焉

二十有三年春齊侯伐宋圍緡

齊不恤宋之敗而討其不與齊之盟譏之也

夏五月庚寅宋公茲父卒秋楚人伐陳冬十有一月杞

子卒

杞嘗稱侯且稱伯矣稱子紼也

二十有四年春王正月夏狄伐鄭

二十年鄭人入滑是歲復伐之王使如鄭請滑鄭不聽命王怒使頽叔桃子出狄師以伐鄭

秋七月冬天王出居于鄭

王德狄之伐鄭也以狄女為后叔帶通之王訃狄后頽叔桃子奉叔帶以狄師攻王王御士將禦之王曰先后其謂我何寧使諸侯圖之遂出適鄭處于汜天子無出其曰出王自出也其曰居于鄭諸侯不敢有

其地也

晉侯夷吾卒

二十三年九月晉惠公卒而懷公立是年正月秦伯納文公三月殺懷公皆莫以告文公既定位乃告惠公之喪故不書月與日志亂也

二十有五年春王正月丙午衛侯燬滅邢夏四月癸酉衛侯燬卒宋蕩伯姬來逆婦

伯姬魯女嫁于宋蕩氏母為子逆婦非禮也曰婦由

姑言之也

宋殺其大夫

稱國以殺而不名其大夫殺無罪也公羊曰宋三世無大夫三世內娶也使宋誠三世內娶乎禮未有不臣妻之父者從而不名其大夫是許之也穀梁曰不書名姓以其在祖之位尊之也春秋豈為孔氏作歟而尊其祖以及其大夫也

秋楚人圍陳納頓子于頓

頓子迫於陳而出故楚人圍陳所以納頓子也言納則內有弗受者也

葬衛文公冬十有二月癸亥公會衛子莒慶盟于洮衛成公稱子喪未逾年也莒慶莒大夫也以其釋鄆之怨特書嘉之也

二十有六年春王正月己未公會莒子衛甯速盟于向齊人侵我西鄙公追齊師至郿弗及

侵曰人追曰師不可言公追齊人故也

夏齊人伐我北鄙衛人伐齊公子遂如楚乞師  
乞重辭也師出不必反戰不必勝故以乞言之齊再  
伐魯故乞師於楚齊雖有罪而魯乞師於夷狄以伐  
中國亦譏之也

秋楚人滅夔以夔子歸

夔楚之同姓而不名楚子非特書故也以為人楚子  
甚於名楚子也

冬楚人伐宋圍縕

晉文公之出也過宋宋襄公厚遇之及其反國宋遂叛楚即晉故楚人伐之

公以楚師伐齊取穀公至自伐齊

二十有七年春杞子來朝夏六月庚寅齊侯昭卒秋八月乙未葬齊孝公己巳公子遂帥師入杞冬楚人陳侯蔡侯鄭伯許男圍宋

楚人楚子也稱人非特書也公羊曰為其執宋公故終僖之篇貶之也夫楚子之執宋公稱子以執伯討

也而謂其終身不免則過矣况終僖之篇於楚子何有哉

十有二月甲戌公會諸侯盟于宋

公與楚有好故於其圍宋而會之宋方見圍書曰盟于宋不嫌其與盟也

二十有八年春晉侯侵曹晉侯伐衛

文公之出也曹衛皆不禮焉及楚子圍宋宋人告急  
狐偃曰楚始得曹而新昏於衛若伐曹衛楚必救之

則宋免矣於是假道於衛以侵曹衛人不許還自南  
河濟侵曹伐衛曹以不禮為過故曰侵衛以不假道  
為罪故曰伐齊桓侵蔡蔡潰而遂伐楚故一稱齊侯  
今侵曹與伐衛異道故再稱晉侯

公子買戍衛不卒戍刺之

周禮有三刺之法故內殺大夫皆曰刺諱之也買始  
為楚戍衛楚人救衛不克公懼於晉殺買以說而以  
不卒戍告楚刺未有書其故者書其故言非其實也

楚人救衛三月丙午晉侯入曹執曹伯畀宋人

晉侯以不禮故私討於曹既執曹伯又以予宋人皆非義也其稱晉侯以伯討書之何也書晉侯為入曹也既言晉侯入曹故不可復言晉人執曹伯非以伯討許之也曹伯失地而不名何也出而國無君也

夏四月己巳晉侯齊師宋師秦師及楚人戰于城濮楚師敗績楚殺其大夫得臣

晉文公自是始得諸侯故宋公齊國歸父崔天秦小

子慤皆稱師言衆與之也文公既克曹衛楚子入居于申使申叔去穀使得臣去宋得臣使伯棼請戰楚子怒之而不止也及其從晉師也晉師退舍避之楚衆欲止得臣不可故敗得臣則有罪矣而楚以一敗殺之故稱國以殺言君亦過也得臣之不氏以特書故也

衛侯出奔楚

衛侯失地而不名何也其出也使元咺奉叔武以受

盟國猶其國也

五月癸丑公會晉侯齊侯宋公蔡侯鄭伯衛子莒子盟

于踐土

晉既克楚合諸侯于踐土王因往勞享之而策命之  
為侯伯使王子虎會諸侯于王庭虎不書不與盟也  
不書王之來會天子而從諸侯諱之也衛侯使叔武  
攝事以受盟故稱子以未成君之名稱之言非王命  
也

陳侯如會公朝于王所六月衛侯鄭自楚復歸于衛  
名其復歸終見其失地也元咺叔武非難其歸者也  
而國人不喜故書曰復歸

衛元咺出奔晉

衛侯不信叔武先期而入公子歛犬華仲前驅叔武  
將沐聞君至喜捉髮走出前驅射而殺之故元咺出  
奔訟之於晉

陳侯歛卒春秋杞伯姬來公子遂如齊冬公會晉侯齊侯

宋公蔡侯鄭伯陳子莒子邾子秦人于溫天王狩于河  
陽

晉文公將帥諸侯以尊事天子而不敢合諸侯於京  
師故召王於河陽而以諸侯見其情則順而禮則逆  
也仲尼曰以臣召君不可以訓然而其情不可不察  
也故書曰天王狩于河陽使若巡狩然尊周且以全  
晉也然則踐土之不言王狩何也踐土之會王自往  
耳非晉之罪也故為王諱之而足矣溫之會晉之罪

也晉雖有罪而其情則順故為王諱之為晉解之而後可也

壬申公朝于王所晉人執衛侯歸之于京師衛元咺自晉復歸于衛

衛侯執則咺之歸無難矣然咺之訟衛以不寧國人之所不喜也故稱復歸

諸侯遂圍許

溫之諸侯也許比再會不至故因會討之

曹伯襄復歸于曹遂會諸侯圍許

襄之名亦終見其失國也其言遂會諸侯圍許則襄  
猶未歸也其言復歸于曹既許之也

二十九年春介葛盧來

介小國也其名夷也不言朝公在會也

公至自圍許夏六月會王人晉人宋人齊人陳人蔡人

秦人盟于翟泉

公會王子虎晉狐偃宋公孫固齊國歸父陳驥濤塗

秦小子慾盟于翟泉尋踐土之盟且謀伐鄭也公不書諱與大夫盟也卿不書罪之也在禮卿不會公侯會伯子男可也

秋大雨雹冬介葛盧來

春不見公故冬復來不言朝不能朝也

三十年春王正月夏狄侵齊秋衛殺其大夫元咺及公

子瑕

王釋衛侯衛侯使周歛治厘殺元咺及瑕而後入稱

國以殺咺瑕雖有罪而君亦有過也瑕立逾年矣其不稱君何也為君非瑕志也是以先元咺而後瑕言事之在咺也

衛侯鄭歸于衛

元咺既死則衛侯之歸無難矣不言復歸衛自是少安也

晉人秦人圍鄭

晉侯之出也鄭文公亦不禮焉故晉侯秦伯圍鄭其

稱人何也專以其私討人罪之也

介人侵蕭冬天王使宰周公來聘公子遂如京師遂如晉

內曰如外曰使皆君命也所謂以二事出者也

三十有一年春取濟西田

曹田也曷為不言取曹濟西田晉人執曹伯而以其田分諸侯非吾取之曹也

公子遂如晉夏四月四卜郊不從乃免牲猶三望

禮諸侯不祭天地魯以周公故孟春祈穀于上帝所謂啓蟄而郊也常以二月卜三月上辛不吉則卜中辛不吉則卜下辛三卜而不從則不郊矣四月非時也四卜非禮也穀梁曰以十二月下辛卜正月上辛不從則以正月下辛卜二月上辛不從則以二月下辛卜三月上辛然則不待啓蟄而郊禮乎禮帝牛必在滌三月稷牛惟具牛卜日曰牲牲成而不郊則卜免牲不吉則不郊而已以為嘗致之上帝弗敢專也

猶者可已之辭也禮既郊而望望郊之細也不郊亦無望可也謂之望者國之所望山若川也魯之望三太山河海是歟

秋七月冬杞伯姬來求婦狄圍衛十有二月衛遷于帝丘

三十有二年春王正月夏四月己丑鄭伯捷卒衛人侵狄狄衛人及狄盟冬十有二月己卯晉侯重耳卒三十有三年春王二月秦人入滑齊侯使國歸父來聘

夏四月辛巳晉人及姜戎敗秦師于殽

三十年秦晉圍鄭秦伯私與鄭盟使杞子逢孫揚孫  
戍之而還杞子自鄭導秦以襲鄭秦伯使孟明西乞  
白乙出師師及滑鄭商人弦高遇之以君命犒師孟  
明曰鄭有備矣不可冀也滅滑而還晉先軫請擊之  
襄公在喪遂墨衰絰以出兵及姜戎要之於殽敗之  
其稱人何也文公之入秦之力也故雖穆公私與鄭  
盟而文公不問今襄公爭小忿而忘大德罪之也孟

明不書非卿

癸巳葬晉文公狄侵齊公伐邾取訾婁秋公子遂帥師  
伐邾晉人敗狄于箕冬十月公如齊十有二月公至自  
齊乙巳公薨于小寢隕霜不殺草李梅實晉人陳人鄭  
人伐許

春秋集解卷五

欽定四庫全書會要卷一千三百四

經部

春秋集解卷六

宋 蘇轍 撰

文公

元年春王正月公即位

莊襄未葬而子般子野卒其稱名未逾年也文成定之即位也僖宣昭皆未葬其稱公以即位既逾年也一年不可以二君故終年稱子而未葬則名不可以逾年無君故逾年雖未葬而稱公以即位也其非即

位則雖逾年不稱公八年八月天王崩九年春毛伯來求金不稱王命是也

二月癸亥日有食之天王使叔服來會葬

叔服天子大夫故不名諸侯之葬天子使大夫會焉禮也

夏四月丁巳葬我君僖公天王使毛伯來錫公命

毛伯王之卿士也禮諸侯即位天子錫之命圭合瑞以為信晉惠公之立也王使召武公內史過錫之命

而惰於受瑞是也

晉侯伐衛叔孫得臣如京師衛人伐晉

晉以衛之不朝也伐之衛孔達伐晉以報背盟而亢  
大國稱人罪之也

秋公孫敖會晉侯于戚

禮卿不會諸侯而魯大夫出會諸侯皆無譏魯史也

冬十月丁未楚世子商臣弑其君頤

顧成王也商臣稱世子而頤稱君者君之於世子有

父之親有君之尊稱世子明其親也稱君明其尊也商臣之於尊親盡矣

公孫敖如齊

二年春王二月甲子晉侯及秦師戰于彭衙秦師敗績

丁丑作僖公主

作主不書此所以書非時也禮葬畢而虞虞而作主喪主於虞吉主於練虞主用桑練主用栗

三月乙巳及晉處父盟

晉人以公不朝來討公如晉晉人使陽處父盟公以  
恥之禮諸侯不親盟於他國而况敵處父乎故不書  
公如晉又不書公及晉處父盟諱之也處父之不氏  
罪晉也

夏六月公孫敖會宋公陳侯鄭伯晉士縠盟于垂隴  
謀衛也於是衛執孔達以說于晉

自十有二月不雨至于秋七月八月丁卯大事于太廟  
躋僖公

大事者何合昭穆於太廟也禮三年喪畢而禘未畢喪故不曰禘也然則吉禘于莊公其曰禘何也禮樂備也禮樂備曰吉禘不備曰大事僖公閔公之兄也閔嘗為之君矣兄弟之不先君臣禮也其曰躋僖公非禮也所謂逆祀也

冬晉人宋人陳人鄭人伐秦

殽之敗秦穆公不替孟明而悔過自誓列於周書及彭衙之敗復用孟明增修德政重施於民君子善之

晉人使先且居會宋公子成陳轍選鄭公子歸生伐之取汪及彭衙以報彭衙之役卿稱人以其不務德而力爭罪之也罪晉所以善秦也

公子遂如齊納幣

三年春王正月叔孫得臣會晉人宋人陳人衛人鄭人伐沈沈潰夏五月王子虎卒秦人伐晉

秦伯伐晉濟河焚舟取王官及郊晉人不出遂自茅津濟封殺尸而還遂伯西戎書曰秦人伐晉而不稱

秦伯何也亦不善其爭也諸侯之相侵伐者衆矣春秋因其得失而正之未有不善其爭者也此獨不善其爭何也春秋之際諸侯以力相尚而不知德未可以非其爭也穆公之悔過自誓為近之矣而猶未免於爭是以非之也

秋楚人圍江雨螽于宋冬公如晉十有二月己巳公及晉侯盟

晉人懼其無禮於公也故請改盟雖親盟於其國猶

可書也

晉陽處父帥師伐楚以救江

伐楚而圍江之師解此所以救江也

四年春公至自晉夏逆婦姜于齊

卿不行非禮也曰婦有姑之詞也公羊曰娶于大夫略之也公子遂如齊納幣納幣于齊也孰謂娶于大夫乎穀梁曰親迎而曰婦成禮乎齊也不言公何以知其親迎也宋蕩伯姬來逆婦杞伯姬來求婦皆由

姑言之也

狄侵齊秋楚人滅江晉侯伐秦

晉侯圍祁新城以報王官之役稱晉侯不復罪之何  
也見伐而報非得罪於法也而有德者不然故特一  
譏而已若皆譏之將不可勝譏也

衛侯使甯俞來聘冬十有一月壬寅夫人風氏薨

僖公之妾母也凡魯君之妾母其生也稱夫人其沒  
皆以夫人之禮成之而天子諸侯亦以夫人之禮禮

之考之舊典則非禮也然春秋書之不為異詞者君臣之禮也

五年春王正月王使榮叔歸含且賄

珠玉曰含車馬曰賄不言天王闕文也不言來歸避不周也穀梁曰不言來不周事之詞也賄以蚕含以晚禮曰含者執璧將命入升堂致命子拜稽願含者坐委於殯東南有葦席既葬蒲席降出反位蓋以助喪盡恩而不必用也且國有遠近而皆責其及事可

乎

三月辛亥葬我小君成風王使召伯來會葬

仲子雖聘而非惠公之嫡也故特為之宮而不祔不  
書其葬蓋禮之正也自成風以來妾母皆葬蓋祔也  
魯禮之變自此始矣諸侯必有使來會葬者矣以微  
故不錄王人雖微必書石尚歸脰是也而况召伯乎  
夏公孫敖如晉秦人入鄀秋楚人滅六冬十月甲申許

男業卒

六年春葬許僖公夏季孫行父如陳秋季孫行父如晉  
八月乙亥晉侯驩卒冬十月公子遂如晉葬晉襄公晉  
殺其大夫陽處父晉狐射姑出奔狄

晉人蒐于夷使狐射姑將中軍趙盾佐之陽處父至  
自溫改蒐于董謂趙盾能而上之射姑怨之使續鞠  
居殺之晉殺鞠居射姑奔狄不書射姑之殺而書曰  
晉殺其大夫陽處父何也處父之死自取之也置帥  
非處父之任也處父有罪則其不稱晉人以殺何也

雖有罪而殺之則甚矣故書曰狐射姑出奔狄亦罪之也

閏月不告月猶朝于廟

不告月者不告朔也何以不言朔閏非常月也雖非常月而告月以聽政禮也其曰猶朝于廟幸其不已之詞也子貢欲去告朔之餼羊子曰爾愛其羊我愛其禮雖不告月而猶朝于廟而又將已之乎公羊穀梁曰閏月者附月之餘日天子不以告朔而喪事不

數也猶之為言可以已也春秋蓋有同詞而異實者矣猶三望猶繹可以已也猶朝于廟幸其不已也

七年春公伐邾三月甲戌取須句

僖公取須句而反其君邾又滅之故復伐邾而取之

遂城郚

以備邾也

夏四月宋公王臣卒宋人殺其大夫

宋昭公將去羣公子穆襄之族帥國人以攻公殺公

孫固公孫鄭于公宮書曰宋人殺其大夫非君命也大夫不名非其罪也夫君殺之而非其罪則書曰宋殺其大夫公孫固公孫鄭可也宋人殺之而非其君若又名之則不見其非罪也

戊子晉人及秦人戰于令狐晉先蔑奔秦

晉襄公卒靈公少晉人為難故欲立長君趙盾使先蔑士會逆公子雍于秦既而畏逼乃背之而立靈公趙盾將而禦秦師先蔑奔秦趙盾之稱人罪之也舍

太子而外求君非謀也先蔑之不言出自師奔也

狄侵我西鄙秋八月公會諸侯晉大夫盟于扈

齊侯宋公衛侯鄭伯許男曹伯會晉趙盾盟于扈晉侯立故也不書其人公後至不及序也

冬徐伐莒公孫敖如莒泣盟

八年春王正月夏四月秋八月戊申天王崩冬十月壬午公子遂會晉趙盾盟于衡雍乙酉公子遂會雒戎盟于皋

公子遂既盟趙盾四日而盟雒戎皆公命也何以知其皆公命也以其書雒戎之盟與書趙盾之盟一也公孫敖如京師不至而復丙戌奔莒

七年公子遂娶于莒公孫敖如莒泣盟且為遂逆見女美而自取之遂將攻之公止之使遂舍之使敖反之復為兄弟如初及敖將如周弔遂以幣奔莒從己氏公子遂如齊至黃乃復書至而後書復今不言至而言復何也遂之如齊也欲至齊而以疾不能敖無

至周之意矣故曰不至而已不言出自外行也

螽宋人殺其大夫司馬宋司城來奔

宋襄夫人襄王之姊也昭公不禮焉夫人因戴氏之族以殺襄公之孫孔叔公孫鍾離及大司馬公子卬皆昭公之黨也司馬握手節以死故書以官書曰宋人殺其大夫非君命也司城蕩意諸來奔效節於府人而出公以其官逆之亦書以官皆貴之也

九年春毛伯來求金

非禮也不稱王命未葬也

夫人姜氏如齊

歸寧也

二月叔孫得臣如京師辛丑葬襄王晉人殺其大夫先

都

夷之蒐晉侯將登箕鄭父先都而使士縠梁益耳將  
中軍先克曰狐趙之勲不可廢也從之先克奪蒯得  
田于董陰故箕鄭父先都士縠梁益耳蒯得作亂使

賊殺先君晉人誅之故皆書曰晉人殺其大夫殺有罪也

三月夫人姜氏至自齊

春秋夫人適他國未有至之者皆非禮不告廟故也  
惟此以歸寧告廟故書

晉人殺其大夫士縠及箕鄭父楚人伐鄭

楚自城濮之敗不復侵伐中國晉文襄既沒靈公少  
自是始復伐鄭

公子遂會晉人宋人衛人許人救鄭

晉趙盾宋華耦衛孔達許大夫救鄭緩不及楚師故皆稱人

夏狄侵齊秋八月曹伯襄卒九月癸酉地震冬楚子使叔來聘

楚自僖公以來雖交通諸侯而朝聘不常盟會不繼夷風猶在也故書其君臣皆曰人而已至是齊晉日衰楚人接迹於中國於是書其君臣與諸侯比然叔

猶不氏蓋漸進之也

秦人來歸僖公成風之襚

魯之喪諸侯蓋有來襚者矣而獨書秦始通也秦人  
秦之微者也襚衣服也僖公成風之喪久矣而不以  
緩為譏者亦以其始通錄之也成風之不稱夫人何  
也非薨非葬名有所不必盡也

葬曹共公

十年春王三月辛卯臧孫辰卒夏秦伐晉

是年春晉人伐秦取少梁秦伯伐晉取北徵秦晉相攻久矣無他得失而獨書曰秦伐晉遂以戎狄書之理不然也或者書秦伯闕文也

楚殺其大夫宜申

宜申與仲歸謀弑楚穆王而誅當書曰楚人殺大夫蓋以簡文也

自正月不雨至于秋七月及蘇子盟于女栗冬狄侵宋

楚子蔡侯次于厥貉

將伐宋而不行故書次

十有一年春楚子伐麇夏叔仲彭生會晉郤缺于承筐  
秋曹伯來朝公子遂如宋狄侵齊冬十月甲午叔孫得  
臣敗狄于鹹

十有二年春王正月鄭伯來奔

鄭太子朱儒自安於夫鍾國人不徇鄭伯卒鄭人立  
君太子以夫鍾及鄭邦來奔公以諸侯逆之非禮也  
書曰鄭伯來奔著吾過也不名非諸侯特加之也不

書地既謂之諸侯尊之不言地也

杞伯來朝二月庚子子叔姬卒夏楚人圍巢秋滕子來朝秦伯使術來聘冬十有二月戊午晉人秦人戰于河曲

秦伯伐晉取羈馬晉趙盾禦之皆稱人以其亟戰罪之也

季孫行父帥師城諸及鄆

十有三年春王正月夏五月壬午陳侯朔卒邾子蘧蒢

卒自正月不雨至于秋七月太室屋壞

周公曰太廟魯公曰太室屋壞書不共也

冬公如晉衛侯會公于沓狄侵衛十有二月己丑公及晉侯盟公還自晉鄭伯會公于棐

十有四年春王正月公至自晉邾人伐我南鄙叔彭生帥師伐邾夏五月乙亥齊侯潘卒六月公會宋公陳侯衛侯鄭伯許男曹伯晉趙盾癸酉同盟于新城

會書月盟書日會成於月盟成於日也書同盟從於

楚者服也

秋七月有星孛入于北斗公至自會晉人納捷菑于邾  
弗克納

邾文公元妃齊姜生纁且二妃晉姬生捷菑文公卒  
邾人立纁且捷菑奔晉晉趙盾帥諸侯之師八百乘  
納之于邾邾人辭曰齊出纁且長盾曰詞順而弗從  
不祥乃還書盾之弗克納善之矣其稱人何也興諸  
侯之師將以廢長立少入邾之境而後知其非所興

者廣所害者衆善未足以覆過也捷菑之不稱公子將以為君也

九月甲申公孫敖卒于齊

敖之奔莒七年矣至此請重賂以求復其子難以為請許之將歸而卒于齊大夫出奔不卒敖之卒既許之復也

齊公子商人弑其君舍

商人將以為君其稱公子何也州吁無知將以為君

而不終故不稱公子以見其欲為君也商人終為君矣不待去公子而後見也稱公子以親責之也舍未逾年而稱君既葬也若以其未逾年而不稱君是商人之罪可得而免也正舍之名所以正商人之罪也

宋子哀來奔

宋高哀為蕭封人以為卿不義宋公而出二年而宋人弑其君不名而字貴之也

冬單伯如齊齊人執單伯齊人執子叔姬

子叔姬妃齊昭公生舍商人弑舍而立襄仲使告于王請以王寵求子叔姬于齊王使單伯為魯請齊人執之并執子叔姬諸侯而執王使不稱行人尊周也公羊穀梁曰單伯之罪道淫也猶以為魯大夫也魯無單伯以意而言春秋則亦無所不至也

十有五年春季孫行父如晉

為單伯與子叔姬故將因晉以謂齊也

三月宋司馬華孫來盟

宋司馬華耦來盟其官皆從故書曰宋司馬華孫不  
言使盟在華孫也

夏曹伯來朝齊人歸公孫敖之喪

敖以罪出魯人以孟氏故不絕其親而許其歸禮也  
六月辛丑朔日有食之鼓用牲于社單伯至自齊

齊侯以晉故許單伯請單伯過魯致命而歸周故喜  
而致之也

晉郤缺帥師伐蔡戊申入蔡秋齊人侵我西鄙季孫行

父如晉

復為齊故也

冬十有一月諸侯盟于扈

晉侯宋公衛侯蔡侯鄭伯許男曹伯會盟而謀伐齊  
於是齊難公不會齊侯賂晉侯不克而還書曰諸  
侯而不序無能為也

十有二月齊人來歸子叔姬

不言齊子叔姬來歸而曰齊人來歸子叔姬言叔姬

無罪而齊人絕之也

齊侯侵我西鄙遂伐曹入其郛

齊侯謂諸侯無能為也故復侵魯遂伐曹討其朝於  
魯也

十有六年春季孫行父會齊侯于陽穀齊侯弗及盟

公將及齊平而有疾使季孫行父會齊侯而請盟齊

侯不信曰請俟君問書曰齊侯弗及盟曲在齊也

夏五月公四不視朔

諸侯告朔聽政因朝于廟公四不視朔疾也公蓋有以疾不視朔者矣四不視朔以久書也公羊曰自是無疾不視朔也定哀之間子貢欲去告朔之餼羊蓋不復視朔矣此公羊之所以為此言也然而五月書四不視朔則六月視朔之廢非始為此也

六月戊辰公子遂及齊侯盟于鄆丘

公使遂納賂于齊侯而後受盟

秋八月辛未夫人姜氏薨毀泉臺

有蛇自泉臺出既而夫人薨魯人以為妖而毀之非政也

楚人秦人巴人滅庸冬十有一月宋人弑其君杵臼宋昭公不能於其大夫國人襄夫人亦惡之公田孟諸夫人使帥甸攻而弑之書曰宋人弑其君君無道也

十有七年春晉人衛人陳人鄭人伐宋

晉荀林父衛孔達陳公孫寧鄭石虎將討宋之弑君

不克而還故皆稱人

夏四月癸亥葬我小君聲姜齊侯伐我西鄙六月癸未公及齊侯盟于穀諸侯會于扈

晉侯為扈之會將以平宋亂而不能故書曰諸侯而不序略之也宋昭公雖以無道弑而諸侯大夫皆以不討賊為譏明君臣之義不可廢也

秋公至自穀冬公子遂如齊

十有八年春王二月丁丑公薨于臺下秦伯鑿卒夏五

月戊戌齊人弑其君商人

商人多行無禮其為公子也與邴歎之父爭田弗勝及即位掘而刖之納閭職之妻而使職驂乘故二人謀而殺之二人皆非大夫不稱盜而稱人見君之無道也

六月癸酉葬我君文公秋公子遂叔孫得臣如齊  
遂賀齊惠公立得臣會葬文公累數之者偕行也非相為介也

冬十月子卒

文公夫人出姜生惡及視二妃敬羸生宣公敬羸嬖而私事公子遂故遂弑惡及視而立宣公書曰子卒諱之也不日失之也不名既葬也

夫人姜氏歸于齊季孫行父如齊莒弑其君庶其


庶其生太子僕及季佗愛季佗而黜僕且多行無禮於國僕因國人而弑之故稱國以弑

欽定四庫全書

卷六



春秋集解卷六



覆校官編修臣曹城

校對官檢討臣郭寅

謄錄監生臣牛繼祖

欽定四庫全書叢要

經部

春秋集解卷七至九



詳校官原任侍講  
臣王蔬緒

欽定四庫全書

春秋集解卷七

經部

春秋集解卷七

宋 蘆轍 撰

宣公

元年春王正月公即位公子遂如齊逆女三月遂以夫人婦姜至自齊

遂之不氏因前也曰婦有姑之辭也或稱婦姜或稱婦姜氏文有詳略非義之所在也

夏季孫行父如齊晉放其大夫胥甲父于衛

文十二年秦晉戰于河曲秦人夜戒晉師臾骈曰使者自動而言肆懼我也薄諸河必敗之胥甲趙穿當軍門呼曰死傷未收而棄之不惠也不待期而薄人於險無勇也乃止於是晉人討不用命者放胥甲于衛胥甲趙穿其罪一也放甲而舍穿穿盾之族也故稱國以放言政之不一也

公會齊侯于平州

公以篡立故使季孫行父納賂于齊而求會焉以定

其位

公子遂如齊六月齊人取濟西田秋邾子來朝楚子鄭人侵陳遂侵宋晉趙盾帥師救陳

左傳曰救陳宋獨稱救陳闕文也

宋公陳侯衛侯曹伯會晉師于棐林伐鄭

不曰會晉趙盾而曰會晉師言兵會非好會也雖以

諸侯會大夫無譏也

冬晉趙穿帥師侵崇

崇秦之與國晉將求成于秦故侵崇秦弗與成於是  
晋靈公侈故不競於秦楚

晋人宋人伐鄭

二年春王二月壬子宋華元帥師及鄭公子歸生帥師  
戰于大棘宋師敗績獲宋華元秦師伐晉夏晉人宋人  
衛人陳人侵鄭秋九月乙丑晉趙盾弑其君夷皋

晋靈不君趙盾驟諫公欲殺之盾將出奔而趙穿弑  
公於桃園盾未出山而復晉史書曰趙盾弑其君盾

曰不然史曰子為正卿亡不越境反不討賊非子而誰盾曰於乎我之懷矣自貽伊慙其我之謂矣孔子聞之曰惜也越境則免或曰弑君大惡也不越境微過也盾不弑君而以不越境加之弑君之名可乎曰亡而越境則盾誠亡也反而討賊則盾誠不知謀也今亡而不越境反而不討賊孰知非盾之偽亡而使穿弑君者如是而以穿居弑君之名則盾計得矣弑君之罪而容以計免乎故曰於晉趙盾見忠臣之至

於許世子止見孝子之至此二者所以為教也非以為法也然則今將舉弑君之罪而誅盾也可乎曰舉弑君之罪以責盾則可舉弑君之罪以誅盾則不可昔者郭解之客為解殺人而解不知公孫弘曰解布衣為任俠行權以睚眦殺人解雖不知甚於知之遂以誅解其所以責解者善矣然至以誅解則非法也孟子曰今有禦人於國門之外而饋以道則其罪死以不義取之於民而饋以道則受於孔子以不義取

之於民者猶禦也則孔子亦受禦歟夫以不義取之  
於民者猶禦也克類至義之盡也克類至義之盡而  
名之曰禦則可以禦誅之則不可故春秋以弑君責  
盾而非以弑君誅盾也不以弑君責盾則以不義取  
之於民者非禦也以弑君誅盾則以不義取之於民  
者皆死也而可乎故曰此所以為教也非以為法也  
司馬遷有言為人君父而不通春秋之義者必蒙首  
惡之名為人臣子而不通春秋之義者必陷篡弑之

罪其實皆以善為之而不知其義被之空言而不敢辭夫不通禮義之旨至於君不君臣不臣父不父子不予以此四行者天下之大過也以天下之大過予之受而不敢辭故春秋者禮義之大宗也遷意在是也

冬十月乙亥天王崩

三年春王正月郊牛之口傷改卜牛牛死乃不郊猶三望

牛不曰牲未卜日也正月尚可以養牛牛死當復改

卜而遂不郊非禮也不郊而望亦非禮也天王未葬而郊不為非禮者不以王事廢天事也

葬匡王楚子伐陸渾之戎夏楚人侵鄭秋赤狄侵齊宋師圍曹冬十月丙戌鄭伯蘭卒葬鄭穆公

四年春王正月公及齊侯平莒及邾莒人不肯公伐莒取向秦伯稻卒夏六月乙酉鄭公子歸生弑其君夷

楚人獻鼃於鄭靈公公子宋與歸生將見宋食指動以示歸生曰他日我如此必嘗異味及入宰夫將解

龜相視而笑公問之以告及食大夫龜召宋而弗與  
也宋怒染指於鼎嘗之而出公怒欲殺之宋與歸生  
謀先歸生曰畜老猶憚殺之而况君乎反譖歸生懼  
而從之故書曰鄭公子歸生弑其君夷首弑君者宋  
也舍宋而書歸生何也曰弑君之禍成於二人二人  
不可并書將書其一而已宋首弑君其罪不疑書其  
不疑則歸生可得免也歸生之罪成於不得已疑若  
可免也弑君之罪不可以疑免書其疑者而其不疑

者可知也宋襄公使邾文公用鄫子于次且之社春  
秋書邾人而不及宋亦猶是也

赤狄侵齊秋公如齊公至自齊冬楚子伐鄭

五年春公如齊夏公至自齊秋九月齊高固來逆叔姬  
叔孫得臣卒冬齊高固及子叔姬來楚人伐鄭

六年春晉趙盾衛孫免侵陳夏四月秋八月螽冬十月  
七年春衛侯使孫良夫來盟夏公會齊侯伐萊秋公至  
自伐萊大旱冬公會晉侯宋公衛侯鄭伯曹伯于黑壤

八年春公至自會夏六月公子遂如齊至黃乃復辛巳  
有事于太廟仲遂卒于垂壬午猶繹萬人去籥  
繹者祭之明日所以賓尸也萬舞也籥管也卿佐之  
喪可以廢繹矣不知廢繹而於舞之入也去其有聲  
者使弗聞而已非禮也

戊子夫人嬴氏薨晉師自狄伐秦楚人滅舒蓼秋七月  
甲子日有食之既冬十月己丑葬我小君敬嬴雨不克

葬庚寅日中而克葬

禮葬既有日不為雨止故送者不避塗潦而士喪禮  
有潦車載簾笠今雨而不克葬則失於無備也左氏  
曰禮卜葬先遠日避不懷也卜而先遠禮也葬之日  
有進無退而可以為雨止乎

城平陽楚師伐陳

九年春王正月公如齊公至自齊夏仲孫蔑如京師齊  
侯伐萊秋取根牟八月滕子卒九月晋侯宋公衛侯鄭  
伯曹伯會于扈晋荀林父帥師伐陳辛酉晋侯黑臀卒

于扈冬十月癸酉衛侯鄭卒宋人圍滕楚子伐鄭晉郤缺帥師救鄭陳殺其大夫洩冶

陳靈公與孔寧儀行父通於夏姬衷其袒服以戲于朝洩冶諫二子謀殺之公不禁故稱國以殺殺無罪也洩冶強諫以死疑若可賢也而不免於名何也正言於昏亂以陷於死雖無罪而君子不貴也

十年春公如齊公至自齊齊人歸我濟西田夏四月丙辰日有食之己巳齊侯元卒齊崔氏出奔衛

齊崔杼有寵於惠公高國畏其逼也公卒而逐之書曰齊崔氏以其族奔也公羊曰稱崔氏譏世卿也春秋之際大夫世而弑其君者獨崔氏乎而獨譏之也文王之治政也仕者世祿詩曰凡周之士不顯亦世三代之世臣國之所賴以為固也而春秋何譏耶苟失其政豎刁陽虎皆足以為亂曾非世臣也苟執其迹而譏之則過矣

公如齊五月公至自齊癸巳陳夏徵舒弑其君平國

徵舒陳大夫夏姬之子也靈公之惡甚矣其稱臣以弑何也罪不及民也君以無道加其臣子臣子以弑報之而得不名是臣得讎君而子得讎父也故罪不及民者皆稱臣子陳徵舒蔡般是也要之失民而後不稱臣子以民為重也

六月宋師伐滕公孫歸父如齊葬齊惠公晉人宋人衛人曹人伐鄭秋天王使王季子來聘公孫歸父帥師伐邾取繹大水季孫行父如齊冬公孫歸父如齊齊侯使

國佐來聘饑楚子伐鄭

十有一年春王正月夏楚子陳侯鄭伯盟于辰陵公孫  
歸父會齊人伐莒秋晉侯會狄于檟函冬十月楚人殺  
陳夏徵舒

陳靈公之死也孔寧儀行父奔楚故楚子伐陳謂陳  
人無動吾將有討於少西氏遂入陳殺夏徵舒因縣  
陳申叔時使於齊而反謂楚子曰牽牛以蹊人之田  
而奪之牛蹊者信有罪矣而奪之牛罰已重矣諸侯

之從也曰討有罪也今縣陳貪其富也以討召諸侯而以貪歸之無乃不可乎楚子曰善哉吾未之間也於是乃復封陳蓋楚子入陳而殺徵舒今先書楚人殺陳夏徵舒而後書楚子入陳納公孫寧儀行父于陳何也楚子之殺徵舒也既以滅陳而縣之矣非入也及申叔時諫而復封陳然後得為入也孔子以其終復封陳也故不言其滅以其始嘗滅之也故先書殺徵舒而後書入稱人衆詞也以其討有罪也稱子

偏詞也以其入人之國而納有罪也

丁亥楚子入陳納公孫寧儀行父于陳

十有二年春葬陳靈公楚子圍鄭夏六月乙卯晉荀林  
父帥師及楚子戰于邲晉師敗績秋七月冬十有二月  
戊寅楚子滅蕭晉人宋人衛人曹人同盟于清丘

晉原縠宋華叔衛孔達曹人同盟于清丘曰邲病討  
貳既而陳即楚宋伐之而衛人救陳楚伐宋而晉人  
不救故卿不書不實其言也

宋師伐陳衛人救陳

十有三年春齊師伐莒夏楚子伐宋秋螽冬晉殺其大夫先縠

邲之役晉三帥皆不欲戰先縠不可故敗誅之固其宜也然先縠先軫之後先軫晉之舊勲也晉人誅縠而盡滅其族稱國以殺言刑之過也

十有四年春衛殺其大夫孔達

十二年陳貳于楚宋以清丘之盟故伐陳衛孔達曰

先君有約言焉不可不救也若大國討我則死之衛人救陳既而晉人來討於是殺孔達以說孔達則有罪矣而衛人用其言以干盟主故稱國以殺罪累上也

夏五月壬申曹伯壽卒晉侯伐鄭秋九月楚子圍宋葬曹文公冬公孫歸父會齊侯于穀

十有五年春公孫歸父會楚子于宋夏五月宋人及楚人平

楚子圍宋九月而不解宋人告急于晋晋人不救乃使華元夜入楚師登子反之床曰寡君使元以病告敝邑易子而食折骸而爨雖然城下之盟有以國斃不能從也去三十里惟命是聽子反懼與之盟而告王退三十里而與之盟宋將亡而華元能存之楚可取宋而子反能舍之疑若可賢者其稱人何也華元竊入楚師而劫其將子反將而劫於敵雖有善君子不貴也易曰師出以律否臧凶故書平而不書盟為

要盟也宋之平與夾谷之會其不書盟一也

六月癸卯晉師滅赤狄潞氏以潞子嬰兒歸秦人伐晉  
王札子殺召伯毛伯秋螽仲孫蔑會齊高固于無婁初  
稅畝

井田之法一夫百畝十畝為公田今履其餘畝復十  
稅一故哀公曰二吾猶不足其失蓋始於此

冬蠒生

螽子生於冬不能為害而書者亦幸之也

饑

十有六年春王正月晉人滅赤狄甲氏及留吁夏成周宣榭火秋鄭伯姬來歸冬大有年

十有七年春王正月庚子許男錫我卒丁未蔡侯申卒夏葬許昭公葬蔡文公六月癸卯日有食之己未公會晉侯衛侯曹伯邾子同盟于斷道

晉郤克聘于齊齊頃公帷婦人觀而笑之郤克怒請伐之會于斷道討貳也齊侯使高固晏弱蔡朝南郭

偃會晉人辭之書曰同盟齊貳也

秋公至自會冬十有一月壬午公弟叔肸卒

十有八年春晉侯衛世子臧伐齊公伐杞夏四月秋七

月邾人戕鄫子于鄫甲戌楚子旅卒

楚莊王也吳楚之君卒而不葬葬必從其臣子之詞  
吳楚之僭不可信也

公孫歸父如晉冬十月壬戌公薨于路寢歸父還自晉  
至笙遂奔齊

歸父襄仲之子有寵於公欲去三桓以張公室與公謀而聘於晉欲以晉人去之公薨季文子言於朝曰使我殺適立庶以失大援者仲也夫遂逐東門氏歸父還及笙壇帷復命於介既復命袒括髮三踊而出遂奔齊大夫出聘未有言其還者奔未有言其至者書曰歸父還自晉至笙遂奔齊蓋善其得禮也

春秋集解卷七

欽定四庫全書

春秋要卷一千三百六

經部

春秋集解卷八

宋 蘇轍 撰

成公

元年春王正月公即位二月辛酉葬我君宣公無冰三  
月作丘甲夏臧孫許及晉侯盟于赤棘秋王師敗績于  
茅戎

晉侯使瑕嘉平戎於王劉康公徼戎將伐之叔服曰  
背盟而欺大國此必敗不聽遂伐之敗績于徐吾氏

書曰王師敗績于茅戎言自敗也桓五年王伐鄭鄭  
人大敗王師射王中肩書伐而不書敗蓋諱之也若  
茅戎之敗非自敗也則亦書王師伐茅戎可也以為  
背盟而欺大國此自敗之道而非人敗之也此所以  
不諱敗也

冬十月

二年春齊侯伐我北鄙夏四月丙戌衛孫良夫帥師及  
齊師戰于新築衛師敗績六月癸酉季孫行父臧孫許

叔孫僑如公孫嬰齊帥師會晉郤克衛孫良夫曹公子  
首及齊侯戰于鞌齊師敗績

齊侯侵虐魯衛故魯衛乞師于晉以伐之魯四子皆  
卿故書諸侯用兵亦有卿皆行者不書略外也

秋七月齊侯使國佐如師己酉及國佐盟于袁婁

召陵之盟制在屈完故不稱使而書曰來盟于師盟  
于召陵袁婁之盟受命於君而可否在晉故書曰齊  
侯使國佐如師己酉及國佐盟于袁婁時師及齊國

都退而與之盟也

八月壬午宋公鮑卒庚寅衛侯速卒取汶陽田冬楚師  
鄭師侵衛十有一月公會楚公子嬰齊于蜀丙申公及  
楚人秦人宋人陳人衛人鄭人齊人曹人邾人薛人鄫  
人盟于蜀

宣公季年求好于楚莊王二君卒而不果成公即位  
而受盟于晋又有鞶之師故楚公子嬰齊救齊悉師  
以行彭名御戎蔡景公為左許靈公為右侵衛及魯

楚自城濮之敗不競於晉莊王雖入陳圍鄭及宋而未嘗合諸侯及蜀之盟諸侯從之者十有一國晉不敢爭自是與晉力爭諸侯其大夫列于聘會與齊晉齒春秋之法公不會大夫今公會嬰齊而不為公諱以為楚師之強不從則國病為國故許之也然其盟十一國也諸侯實畏晉而竊與之盟故嬰齊與秦右大夫說宋華元陳公孫寧衛孫良夫鄭公子去疾齊大夫皆稱人蓋諸侯背晉而竊與楚盟是以略之也

其後四十二年晉趙武楚屈建合諸侯于宋然後晉  
楚之從得交相見又八年楚靈王求諸侯于晉晉人  
許之然後諸侯公得與楚盟耳蔡侯許男不列於會  
乘楚車也齊後於鄭非卿也

三年春王正月公會晉侯宋公衛侯曹伯伐鄭辛亥葬  
衛穆公二月公至自伐鄭甲子新宮災三日哭乙亥葬  
宋文公夏公如晉鄭公子去疾帥師伐許公至自晉秋  
叔孫僑如帥師圍棘大雩晉郤克衛孫良夫伐唐咎如

冬十有一月晉侯使荀庚來聘衛侯使孫良夫來聘丙午及荀庚盟丁未及孫良夫盟鄭伐許

許恃楚而不事鄭鄭一歲再伐之書曰鄭伐許狄之也罪未至此或者書鄭人伐許而闕文耳

四年春宋公使華元來聘三月壬申鄭伯堅卒杞伯來朝夏四月甲寅臧孫許卒公如晉葬鄭襄公秋公至自晋冬城鄆鄭伯伐許

五年春王正月杞叔姬來歸仲孫蔑如宋夏叔孫僑如

會晉荀首于穀梁山崩秋大水冬十有一月己酉天王崩十有二月己丑公會晉侯齊侯宋公衛侯鄭伯曹伯邾子杞伯同盟于蟲牢

六年春王正月公至自會二月辛巳立武宮取鄆衛孫良夫帥師侵宋夏六月邾子來朝公孫嬰齊如晉壬申鄭伯費卒秋仲孫蔑叔孫僑如帥師侵宋楚公子嬰齊帥師伐鄭冬季孫行父如晉晉欒書帥師救鄭

七年春王正月鼷鼠食郊牛角改卜牛鼷鼠又食其角

乃免牛吳伐鄭

吳太伯之後其爵曰子其稱吳夷之也以其不通中國而用夷禮故也

夏五月曹伯來朝不郊猶三望秋楚公子嬰齊帥師伐鄭公會晉侯齊侯宋公衛侯曹伯莒子邾子杞伯救鄭八月戊辰同盟于馬陵公至自會吳入州來冬大雩衛孫林父出奔晉

八年春晉侯使韓穿來言汶陽之田歸之于齊

汶陽之田本魯之侵地韋之戰晉人使齊人歸之今以齊之服事晉也而使魯歸之非義也

晉欒書帥師侵蔡公孫嬰齊如莒宋公使華元來聘夏

宋公使公孫壽來納幣

昏禮不稱主人此其稱使何也無以主昏詞窮也納幣不書此何以書公孫壽卿也春秋於伯姬之嫁書之最詳納幣致女以卿媵以非禮公羊穀梁不違也皆以為錄伯姬失之矣

晉殺其大夫趙同趙括

趙嬰通于趙莊姬趙同趙括放之于齊莊姬譖曰同  
括將為亂晉侯殺之稱國以殺殺無罪也

秋七月天子使召伯來賜公命冬十月癸卯杞叔姬卒  
晉侯使士燮來聘叔孫僑如會晉士燮齊人邾人伐邾  
衛人來媵

九年春王正月杞伯來逆叔姬之喪以歸公會晉侯齊  
侯宋公衛侯鄭伯曹伯莒子杞伯同盟于蒲公至自會

二月伯姬歸于宋夏季孫行父如宋致女晉人來媵秋

七月丙子齊侯無野卒晉人執鄭伯

鄭伯既受盟于蒲楚人以重賂誘之復會楚公子成於鄧故晉人執之鄭伯背盟而貳於楚稱人以執不得為伯討者晉方不信於諸侯有以致之也

晉欒書帥師伐鄭冬十有一月葬齊頃公楚公子嬰齊帥師伐莒庚申莒潰楚人入鄭秦人白狄伐晉鄭人圍

許

晉人執鄭伯鄭公孫申曰我出師以圍許為將改立君者而舒晉使晉必歸君鄭人從之

城中城

十年春衛侯之弟黑背帥師侵鄭夏四月五卜郊不從乃不郊五月公會晉侯齊侯宋公衛侯曹伯伐鄭

鄭人立世子髡頑樂書曰鄭人立君我執一人何益不如伐鄭歸其君以求成焉於是晉侯有疾立世子州蒲為君以會父在而稱晉侯失父子之道矣

齊人來媵丙午晉侯孺卒秋七月公如晉

公親弔晉喪非禮也晉人止公使送葬諸侯莫在魯人恥之故不書其葬諱之也

冬十月

十有一年春王三月公至自晉晉侯使郤犨來聘己丑及郤犨盟夏季孫行父如晉秋叔孫僑如如齊冬十月十有二年春周公出奔晉

周公楚惡襄惠之逼且與伯輿爭政不勝而出王使

劉子復之盟于鄆而入三日復出凡自周無出周公  
自出故書曰周公出奔晋

夏公會晋侯衛侯于瑣澤秋晋人敗狄于交剛冬十月  
十有三年春晋侯使郤鍇來乞師

晋盟主也其用諸侯之師多矣未嘗乞師也今以列  
國之禮乞師善之也

三月公如京師夏五月公自京師遂會晋侯齊侯宋公  
衛侯鄭伯曹伯邾人滕人伐秦

公將與諸侯伐秦不敢過京師則朝焉非以朝行也不書公朝於京師而書公如京師若以朝行然何也方其未朝也未嘗有事是以置其情而書其迹內詞也且明君臣之禮也

曹伯盧卒于師秋七月公至自伐秦冬葬曹宣公

十有四年春王正月莒子朱卒夏衛孫林父自晉歸于

衛

晉侯使郤犨送孫林父于衛衛人復之故書曰自晉

歸于衛

秋叔孫僑如如齊逆女鄭公子喜帥師伐許九月僑如以夫人婦姜氏至自齊冬十月庚寅衛侯臧卒秦伯卒十有五年春王二月葬衛定公三月乙巳仲嬰齊卒癸丑公會晉侯衛侯鄭伯曹伯宋世子成齊國佐邾人同盟于戚晉侯執曹伯歸于京師

十三年曹伯盧卒于師曹人使公子負芻守使公子欣時逆曹伯之喪負芻殺其世子而自立故晉侯會

于戚以討之稱侯以執執有罪也歸之于京師禮也  
春秋之書執諸侯者多矣惟是為得禮於是諸侯將  
見欣時於王而立之欣時曰前志有之聖達節次守  
節下失節為君非吾節也雖不能聖敢失守乎遂逃  
奔宋故曹伯雖失國而不名曹無君故也

公至自會夏六月宋公固卒楚子伐鄭秋八月庚辰葬

宋共公宋華元出奔晉宋華元自晉歸于宋宋殺其大

夫山宋魚石出奔楚

宋華元為右師魚石為左師蕩澤為司馬華喜為司徒公孫師為司城向為人為大司寇鱗朱為少司寇向帶為大宰魚府為少宰蕩澤弱公室殺公子肥華元不能討乃出奔晉二華戴族也司城莊族也六官皆桓族也魚石將止華元魚府曰右師反必討是無桓氏也魚石曰彼多大勲國人與之不反懼桓氏之無祀於宋也乃止華元于河上請討許之乃反使華喜公孫師帥國人攻蕩氏殺子山魚石向為人鱗朱

向帶魚府出舍於睢上華元止之不可遂奔楚華元之奔晉也未至而復其書曰華元出奔晉且書自晉歸于宋何也元將討山而知力之不能故奔而國人許之討故歸故其討山也雖其族人莫敢救之者故書曰宋華元出奔晉宋華元自晉歸于宋言其出入之正是以能討山也使元懷祿顧寵重於出奔則不能討山矣鄭子產為政豐卷將祭請田弗許卷退而徵役子產奔晉子皮止之歸而逐卷亦猶是也山

之不氏背其宗也山實有罪而稱國以殺何也殺一  
大夫而國幾於亂非外也出者五人而獨稱魚石何  
也魚石卿也

冬十有一月叔孫僑如會晉士燮齊高無咎宋華元衛  
孫林父鄭公子鮒邾人會吳于鍾離

吳夷未嘗與中國會晉為之合諸侯而會之特書曰  
會吳于鍾離以吳為會也

許遷于葉

十有六年春王正月雨木冰

雨木冰五行木不曲直庶徵常寒之罰也劉歆謂上  
陽施不下通下陰施不上通故雨而木為之冰唐讓  
皇帝以為木稼者是也木稼蓋木介爾此記異也

夏四月辛未滕子卒鄭公子喜帥師侵宋六月丙寅朔  
日有食之晉侯使欒黶黶乞師甲午晦晉侯及楚子鄭  
伯戰于鄢陵楚子鄭師敗績楚殺其大夫公子側  
鄢陵之敗也楚以一敗殺之故稱國以殺

秋公會晉侯齊侯衛侯宋華元邾人于沙隨不見公  
郿陵之戰公將會之叔孫僑如通於穆姜欲去季孟  
而取其室公待於壞隤設守而後行故不及於戰沙  
隨之會僑如使告於晉曰魯侯待於壞隤以待勝者  
故晉侯不見公桓十年公會衛侯於桃丘弗遇弗遇  
者不來會也不見公者來而不見也皆曲在外也  
公至自會公會尹子晉侯齊國佐邾人伐鄭曹伯歸自  
京師

公子欣時既奔宋曹人請復曹伯于晉晉侯謂欣時反吾歸而君欣時反曹伯歸欣時置邑與卿而不出賢哉欣時之不取為君也曹雖失君而免於爭國之亂故書曰曹伯歸自京師言無所與爭者也凡諸侯之歸必書曰自某歸於某自某果有奉也歸於某求歸也其曰歸自京師者京師無奉而曹伯不求也非欣時之賢而能至此乎凡諸侯出而國無君者於歸名之曹伯之歸而不名者為欣時故也

九月晉人執季孫行父舍之于苔丘

公之會伐鄭也僑如復使告于晉曰季孫將背晉而事齊楚故晉人為之執行父范文子不可乃許魯平而赦季孫執內大夫而不於其國故復言其所而志之也

冬十月乙亥叔孫僑如出奔齊十有二月乙丑季孫行父及晉郤犨盟于扈公至自會乙酉刺公子偃

十有七年春衛北宮括帥師侵鄭夏公會尹子單子晉

侯齊侯宋公衛侯曹伯邾人伐鄭六月乙酉同盟于柯  
陵

書同盟鄭叛也齊晉之盛天子之大夫會而不盟尊  
周也柯陵之會尹子單子始與諸侯之盟自是習以  
為常非禮也

秋公至自會齊高無咎出奔莒

齊慶克通于聲孟子與婦人蒙衣乘輦以入鮑牽見  
之以告國佐國佐召慶克而謫之夫人怒公反自伐

鄭夫人懇之曰高鮑將不納君而立公子角公不察  
刖鮑牽而逐高無咎無咎之子弱以盧叛

九月辛丑用郊晉侯使荀罊來乞師冬公會單子晉侯  
宋公衛侯曹伯齊人邾人伐鄭十有一月公至自伐鄭  
壬申公孫嬰齊卒于狸脰

嬰齊從於伐鄭還而道卒大夫卒不地其地在外也  
案下十二月丁巳朔則壬申非十一月失之矣

十有二月丁巳朔日有食之邾子纁且卒晉殺其大夫

郤鑄郤犨郤至

晉厲公侈反自鄢陵將盡去諸大夫而立其左右三  
郤族大而多怨謀先誅之郤氏知之郤鑄欲攻公郤  
至止之皆靖以待命公使長魚矯殺之郤氏雖多怨  
於民而公殺之不以其罪故稱國以殺言刑之過也  
楚人滅舒庸

十有八年春王正月晉殺其大夫胥童

胥童厲公之嬖臣也與厲公謀殺三郤又執樂書中

行偃將殺之公不許公使胥童為卿書偃既執厲公乃先殺童童雖道君為亂然書偃自是以弑君故稱國以殺

庚申晉弑其君州蒲

樂書中行偃實弑厲公然而厲公凌虐其臣民以及於禍故稱國以弑罪在君也

齊殺其大夫國佐

齊以高弱之叛使崔杼慶克圍盧國佐從諸侯圍鄭

卷八  
以難請而歸遂如廬師殺慶克以穀叛齊侯殺之佐雖以專殺叛君為罪然其咎發於慶克齊人右慶氏而殺佐故稱國以殺罪累上也

公如晉夏楚子鄭伯伐宋宋魚石復入于彭城

楚子伐宋納魚石向為人鱗朱向帶魚府于彭城而封之不曰納魚石將言魚石之復入故也宣十一年楚子入陳納公孫寧儀行父于陳則何以不言入寧行父則有罪矣楚子討其罪人而納之疑若楚子之

無罪也將正楚子之罪是以言納而不言其入也魚  
石之入不曰自楚何也言伐宋則自楚也不曰叛何  
也將以亂國非止叛也故宋魚石晉欒盈皆不曰叛  
公至自晉晉侯使士匄來聘秋杞伯來朝八月邾子來  
朝築鹿囿己丑公薨于路寢冬楚人鄭人侵宋晉侯使  
士鈁來乞師十有二月仲孫蔓會晉侯宋公衛侯邾子  
齊崔杼同盟于虛丁未葬我君成公

春秋集解卷八